

正
誼
堂
文
集

正誼堂文集卷十四

鄧 董 沛 孟如

墓碑

提督湖北學政光祿寺卿贈侍郎世襲騎都尉謚
文介馮公神道碑銘

咸豐二年十二月己卯粵寇陷武昌提督湖北學政光
祿寺卿仁和馮公死之明年正月事聞

詔贈侍郎予世職

命武昌及杭州並建專祠

特恩賜謚文介其年四月喪歸十年十月始克葬於本

貫龍踞鴟之原寇禍猶亟墓石未具越二十年公子學
澧需次豫章乃屬其友董沛爲神道之銘不敢以例辭
按狀公諱培元字因伯一字小亭世居杭州城內曾祖
行櫟祖維煥父紹唐三世隱德以公貴並贈通議大夫
曾祖妣朱氏祖妣王氏楊氏母沈氏並贈淑人母何氏
封太淑人公爲何太淑人所出三歲喪怙家境貧窶賴
何太淑人矢志鞠養得以成立宵分課讀書聲與刀尺
聲相應往往達旦補諸生食餼於庠道光庚子舉省試
越五年甲辰以一甲三名及第授職編修公長身鶴立
齒白如玉目炯炯有光爲文章下筆千言不加點竄工

詩善書兼曉繪事與都下朋好分曹角藝名動公卿一時勝流無不推服丙午充湖南副考官悉心衡校得士稱盛

文宗嗣位命掌院學士舉翰林之有學行者入直南書房公預其選

賜直廬於澄懷園朝夕供奉咸稱

上意頒豐貂文綺良藥珍玩尙食之屬殆無虛月辛亥充湖北正考官其副爲彭君養恬入闈而病公以一身兼之裁別精當得士如湖南壬子七月擢侍講授湖北學政中道晉學士充日講起居注官再晉光祿寺卿公

卷一百一十一
起自孤寒受

天子特達之知通籍九年峻授卿秩感激知遇欲以讀書稽古之學與楚中人士鼓舞作興以佐文教而遭際厄運不及有所設施身陷危城徒以一死完節嗚呼其可惜矣先是粵寇度嶺五月陷道州六月陷桂陽七月陷郴州遂犯長沙長沙頗堅守賊以支軍緩援師而大隊北趨直犯岳州提督博勒恭武先期遁諸軍皆潰報至武昌巡撫常大淳不知所爲急撤城外防軍嬰城以守而防軍亦潰賊自漢陽駕浮橋濟師分門立壘楚督程矞采駐衡州粵督徐廣緝駐岳州觀望不能救提督

向忠武公獨帥所部追賊營於洪山屢戰皆捷遣銳士
約城內會兵巡撫恆怯持不可諸紳士言之亦不可公
偕武昌尹繡麟力爭之堅不可且令諸營敢有一人出
城者罪立斬公知事已去親自巡城慰勞將士將士無
鬪志解甲以嬉公歸署慟哭十二月戊寅忠武破賊於
沙河距城不多里而城中兵猶不出天大雨援軍始收
隊明日日加辰東城陷賊之登者僅十三人守兵萬餘
一時奔散巡撫以下皆死公督家丁巷戰勢不支乃返
署以印付其友管邦楹曰君無死持此報大營又與玉
玦一日此以報吾母也投繯縣絕拔佩刀自刺家人環

抱之卒不殊公給令具食而與管君至後園指一井曰
此水清冽可葬我我死急掩之北向叩頭南向拜一躍
而入管君急持其衣已不及矣皇遽閒賊目入署管君
匿於旁舍迨昏潛出家人亦有至者乃覓空棺殮之權
瘞於山麓公之初受事也遺幕客馬君貞伯赴杭州迎
養何太淑人遭亂不果馬君復同楚閒關賊中明春始
至會武昌已復走告當事啟山下之殯面如生具冠服
以禮改殮卜日扶公柩自江西返浙權厝於富陽吉祥
寺公長子學瀚次子學灃俱童幼比及歲入都引

見

上垂念忠盡

賞其兄弟皆舉人是爲己未四月明年杭州破學灋奉
何太淑人展轉移徙由蘇松至福建幸保無恙而學瀚
挈妻妹寓餘杭之方山六月辛巳偕鄉人力禦竄賊脣
中一矛遂投水死妻周氏妹學漪俱從死馬君貞伯方
在浙撫王壯愍幕中領官庫銀五百兩爲之收殮且於
龍踞鳴營葬地焉公夫人汪氏已前卒遷公之柩至自
富陽與夫人合葬并葬公女及學瀚夫婦咸如禮馬君
亦杭人可謂不負公者其後省垣再破卒從王壯愍殉
難爲牽連書之公授命時年僅四十汪夫人年四十五

其卒也咸豐五年五月十八日干支亦己卯子學瀚襲
騎都尉學澧署象山訓導升授知縣女字邵書勳未行
殉節孫三人孫女一人沛少愛公書臨摹不釋及官江
右與學澧訂昆季交始知公本末公大節已具

國史及駱文忠公之疏聲光顯鑠垂示千載初不待私
家著述而後傳也顧其子若婦若女同日死烈一門完
行於公有光當時吏牘尙有不及詳者故書公之事并
具述之以備他日史官採擇焉銘曰

耿耿文昌南臨楚江一朝而墮猝見櫬槍儒臣報
國尺寸無柄內外夾攻言之不聽滿腔熱血無所發舒

迺湛寒淵歸於太虛子也恂恂女也婉婉公有義方難毋苟免昔公慈母生以節旌今公佳婦死以烈名仰視九天俯視九地中立斯人不怍不愧惇史有傳襄忠有祠

帝錫恩命昭示來茲旣固且安千秋永宅詒爾雲仍世載令德

武顯將軍前蘇松總兵官李公神道碑銘

公姓李氏諱鉉字文瀾一字綺亭甯波府鄞縣人也遠祖飛將軍廣當漢世以材武顯事具前史其後展轉南遷宋初居明州之奉化明卽今甯波高宗南渡義士仍

保鄉里以拒金人三戰三捷得贈修武郎元至元中始自奉化遷鄞曾祖廷元祖光聲貢生父調宰國子監生三世皆以公貴贈武顯將軍妣皆贈夫人公少失怙至性肫篤哭泣如成人貌癯秀若不勝衣者諸兄慮其弱使習騎射以壯筋力既長而偉飲食兼數人挽強超距同輩莫能逮也乾隆辛卯舉鄉試隨營學習期滿補千總累遷黃巖鎮標遊擊高阿片之掠石坂殿也外吏諱其事而朝官奏之

高宗震怒嚴旨下浙省剋期捕賊撫軍覺羅長麟甚惶懼顧諸將惟公可屬執其手而命之公慨然請行不浹

旬擒其首從

詔嘉之擢玉環參將方是時安南國王阮光平父子篡立民窮財匱乃遣其將以巡海爲名屢刦內洋商船烽火徧三省三省諸寇受其封拜倚之爲逋逃藪於是陳天保莫扶觀朱瀆蔡牽沈鰲王杜之屬蠶屯蠻聚傲岸洲島中者幾二十年玉環孤懸海外財用取自內地而僞宣化公沈鰲屯三盤僞定海侯王杜屯驪洋皆睥睨之公命軍士以大舶運水囊盛糠粃浮其上而伏精卒於兩舷別遣諸將僞爲漁船陰尾之杜誤爲糧舟也約鰲以眾來旦夕會戰賊投艤中悉墮水伏兵起諸將之

師以次進遂擒杜及僞都督翁衡珍乘勝薄三盤并擒
鰲獲船械數百計溫海肅清敘功加二級舊例水師下
洋支放本身銀米家屬無所贍養多以內願逃者公請
於大府通行增給士卒俱爲盡死嘉慶丁巳擢臺灣副
將戊午進蘇松總兵公已卸印篆而僞鎮海王蔡牽糾
眾三萬直叩鹿耳門臺灣官吏畱公不聽去公以臺事
方亟亦願與同守牽不能克收其眾退公督舟師追勦
至淡水港遇颶風賊跳而遁公以所部還臺始公有玉
帶質美而製良提督某見而愛之屢問其值欲公之獻
之也公性樸不解其意提督遂惡公而當時諸戰守浙

帥之功高於閩提督亦奉

旨詰責乃諉咎於他將而以淡水之役劾公縱寇罪立斬有

詔逮問明年會審軍機公得超雪給守備銜赴川湖軍前効力威勇俟額勒登保會諸將於襄陽懸金錢校射百步外中之受上賞公抽矢三發三中威勇大悅檄屯夔州獲功七次攝竹山遊擊堵勦孟峪河白鐵河諸處擒巨盜蔡其左首虜百餘級壬戌之秋川湖流寇略定公復赴閩中署閩安守備李忠毅公長庚追蔡牽至汛公邀斬其黨林秋秋焚獲五艦忠毅解佩刀贈之公之

再官於閩也諸鎮協稱上官者多公舊寮或修故怨而
以公事督過之制府王德與忠毅不相能公爲忠毅所
賞識亦并忌公公鬱鬱不得志疽發於背而卒時嘉慶
甲子七月十日也春秋五十有六配同縣應氏候選直
隸州知州德建女封夫人子三爲瑣爲瑞俱國子監生
爲琯隨任川湖以軍功授千總女三嫁黃式鏞顧全士
盛炳鉞孫男四孫女四以乙丑八月歸葬於鄞縣東吳
之麓嗚呼余嘗觀公一生之遭際蓋與飛將軍同一轍
也抱不世之才而屈於讒慝之口功名甫起僇辱加之
飛將軍之不封侯與公之不建節抑何其遇之類也然

飛將軍雖不遇於時而遷固兩書並有佳傳後之人慨想遺事猶動色言之公之歿於今三十餘年空山墓道片石無銘有能思勞臣之功狀而考其本末者乎以視飛將軍尤不幸矣道光丙午爲琯始介其族人國樹來乞書碑末學蕪辭本非所任夫亦謂公自有不朽者存而無與於文字之優劣也遂不辭而爲之其銘曰

鄧江三派趨海門九十九龍相吐吞英英李公國寶臣建炎義士之子孫樓船橫海馳甌閩坐看巨壑皆潛鱗鬼弧蜮矢橫射人

帝曰宥之奇冤伸東山鑿石營爲墳藐茲坏土吾

皇恩豐碑八尺書公勳下馬過者視此文

資政大夫前雲南布政使蕭公神道碑銘

鄉泉蕭公之歿也鍾侍郎秀旣誌其墓方布政濬頤復爲之傳公生平行誼已具大略孤子彝遊於吾門復以挺道之文爲請乃敘而銘之公諱浚蘭字儀卿鄉泉其別號也先世居長沙宋時有諱維嶽者官延平通判始遷高安遂爲江西高安縣人曾祖映春祖物華俱諸生父元吉嘉慶庚申舉人官河南知府以循吏祀名宦祠事具江西通志三世皆以公貴贈資政大夫曾祖妣祖妣俱況氏母鄭氏並贈夫人生母吳氏封太夫人公生

於祥符官舍故小字祥生有兄蘊蘭早殤及舉公河南君春秋高絕憐愛之自幼穎悟讀書倍常童年十六同籍應試卽補諸生旋舉於鄉成道光甲辰進士改庶吉士明年散館授編修又明年充湖南主試官尋督雲南學政丁未遭嫡母喪去任己酉遭父喪壬子服闋補原官乙卯遷江南道監察御史明年掌京畿道巡視中城又明年轉工科給事中戊午授甘肅甘涼兵備道明年署按察使

賞戴孔雀翎又明年調四川未之任卽擢雲南布政使滇中亂道梗不前部議鑄秩

詔留營襄辦軍務丁卯

賞四品頂帶還其孔雀翎旋遭生母喪奉柩歸里此公一生厯官之本末也公軀幹短小不踰中人而精悍之色時見於眉宇議論雄偉抵掌談天下事左顧右盼千人皆廢歇厯中外逾二十年奔走數千里所在稱職官詞林也朝章國故如肉貫鼎遇有大事公卿咸就諮焉典文衡也端士習培人材孜孜訓迪務勉於正學居西臺也封章屢上彈劾不避權倖軍事得失將帥賢否皆直陳無隱任外僚也日治官書幾廢寢食決疑獄如神明理番回之案無不帖服參軍務也尤以將材爲亟一

拔一能悉與甄錄士心豫附之公受

聖明之知一歲一遷駿駿大用而邁湧回之變中道顛
蹶海內聞者咸爲扼腕及夫奉諱家居年力正盛

天子有意於公

命俟除服

召見而公爲境遇所困不復出山棲息寓廬卒以不起
此則有識之士所以爲公重太息也同治癸酉十月三
十日卒於南昌年五十有二配曹氏新建人江南道監
察御史熊文繼配錢氏嘉興人金山知縣燕女俱封夫
人側室王氏尙氏曹氏子二長葬縣學廩生曹夫人出

次鼐尙氏出女六長適光祿寺署正翁立誠次適石泉
知縣鄭桐三適戶部主事張懷慈四適夔州通判彭祖
厚五適中書科中書周鴻年幼未行孫一人孫女二人
光緒乙亥七月十四日葬公於高安石腦橋西南山之
陽兩夫人皆別葬又十二年始爲之碑余需次江西公
已前卒頗聞公身處困厄而慷慨好施急人之急展轉
稱貸無吝色一日客至以貧乏告公亦蹙額無計相與
痛飲席未終有遠道寄公函者啟視之白金五百也公
大喜亟分其半以饋之公歿後舉債數萬盡斥其衣服
器用不足以償宿負子孫食貧至無一隴之產然士大

夫之知公者則猶唏噓感喟於靡旣也嗚呼難已銘曰
始仕則通而躡於中始境則豐而困於終公處憂患而
不匱其忠公好施濟而不恤其窮山高水長奠厥幽宮
畢然者碑磨且翦銘此神道光熊熊

三品銜江蘇補用知府陳公墓碑銘

公姓陳氏諱政鑰字魚門一字仰樓浙江鄞縣人曾祖
士才州同知銜祖良琨理問銜

詔旌悌弟父賢謾理問銜三世以公貴累贈通奉大夫
曾祖妣孫氏祖妣洪氏母胡氏並贈夫人陳氏故巨家
以好義聞鄉里公負才謂廣交遊爲當道所重郡縣有

事皆倚辦之充道光己酉拔貢敘平土寇功授內閣中書咸豐辛酉粵寇陷甯波護提督陳世章等退保定海公奉母避亂桃花山母夫人旋卒喪事纏具明年移寓江北岸江北爲洋人屯泊所與賊僅隔一水而懾其兵威不敢設僞官故衣冠流寓皆集焉賊犯定海盡覆其眾世章等乘勝思立功增募水師密圖恢復倚公爲東道主而鄞縣西南山村苦寇暴亦謀起義兵逐賊諸生范邦祚實預其事詣公受期會英國領事夏福禮駐甯波接其國主書願出兵助剿象山鄭維春鉤得之以告公大喜招鎮海渠范維邦爲內應維邦頓首受約出萬

金以佐軍餉其議遂定三月四明山義兵起四月丁巳公遣舉人楊鴻鼎等詣定海迎官軍已未官軍發定海以遊擊布興有爲前鋒合靈巖太邱諸鄉兵會攻鎮海次日克之辛酉進次江北岸甲子攻甯波興有督戰船首突和義門英總兵咷樂德克駐三江口發輸船巨礮環擊城堞彈丸如斗大飛墮僞戴王黃呈忠案前呈忠兇懼與僞首王范汝增等皆西竄城遂復世章等權蒞舊任設善後局以公主其事越三日盡定屬縣方是時郡地新復公私草創而廣濟靖逆忠勇奮武勁義威遠常福詔安諸義軍先後至多者千餘少或數百資糧器

械皆仰給府局副將華爾者美國人也督所部常勝軍自上海來費尤鉅巡道史君致謾知府邊君葆諫新受事一切資公公朝夕籌計嚴罰贖課釐金勸富戶輸財與騎軍悍將相攜拄轄轍萬狀有爲他人所決不能堪者而公毅然任之迨至紹興告捷浙東肅清海上之師與左文襄蔣果敏諸軍會甯波始解嚴公亦可以稍息肩矣然而行營之餉猶賴吾郡沂江達河聯驅西上前後解送戶捐市課關稅田賦至六百萬以佐大軍收全省克復之效亦皆公主之也文襄兩疏敘公勞詔授直隸州知州分發江蘇浙中當道爭挽之遂不出

公性剛果遇中外交涉必力持之德國總兵德克碑藉稱軍需索番銀六萬餅副將寶德稜自二月出都四月抵甯波亦索路中兩月俸月五百金公以軍需無證驗月俸當俟到防日計算堅不與乃由其提督仇恭陳牒督撫督撫命量給之往復辨諭始予其半番將布樂師自往蕭山探賊偶被傷索醫藥費公以其私出不允亦由稅務司某箋達都中下浙撫卹之千金皆非公意也浙西既平省中修貢院築海塘創試館郡中建礮臺濬河道復官署營學宮廣善堂增書院以及關隴滇黔諸協饟畿輔閩晉諸振捐百務叢集公靡弗預也巡撫蒞

任均給劄命公司洋務自文武將吏薦紳耆舊嫻戚賓
從四方遊士泊豪商大賈僧道雜流外國曾長日至其
門延納無暇晷高談縱論日夜不倦判決公私裁答籤
記幾於忘寢食公亦不以爲勞也累擢知府加三品銜
晉階爲通奉大夫嗚呼甯波自開元建郡至今歷千餘
年其以鄉士大夫著保障功者唐則黃晟宋則李侃元
則王剛甫有明一代虛無人焉然諸公完守境土以安
桑梓未嘗有恢復功也獨公起自書生流離播遷之餘
奮臂一呼中外響應不煩

朝廷一絲粟之帑一尺寸之兵而屢克名城幾於破竹

遂使鄉邦底定鄰郡敉安悉索敝賦以供

王師征討之用而兩浙胥告平焉嗚呼此古來鄉士大夫未有之績也公功亦偉矣哉公內行肫篤待兄弟子姪恩紀周備好義若飢渴纓紱之士避寇來者代謀衣食俾無失所死則經紀其喪周卹其妻子金嚴甫克捐難民寒衣萬五千襲每歲終在郡城散粥三月俾貧人就食已力不足恆稱貸以益之寒畯負才者尤加禮貌獎借汲引如恐不及身負東南重望出則承迎恐後歸則車馬填咽雖抱疾養疴而以事詣榻前者猶相錯也戊寅五月朔日卒春秋六十有二海內知公者猶以公

之未竟其用爲可惜云配鄭氏鎮海人候選知府贈翰林院檢討熙女前公卒累贈夫人側室王氏贈恭人邵氏贈封恭人子四淇沅同治癸酉年舉人四品銜工部郎中守淑光緒壬午年舉人同知銜麗江知縣俱王恭人出守濟守濱俱邵恭人出女七人其六適士族幼者未行孫二人孫女一人余交公三十年每有公事恆相咨訪楊君坊修鄧志公主其議實延余總之戊寅春赴官江西不及三月而聞公訃余以傳寄公家俾刻於志中公自治生壙於縣西黃公林夏家橋之原今歲丁亥卜日將葬諸子復以碑文請乃敘而銘之其辭曰

四明之山高嵯峨誰與磊落而英多惟公起家拔萃科
寢苦食塊天方瘥突然赤手挽銀河淨洗閩郡無兵戈
比屋可爨田可禾殘黎感泣雙涕沱東鵠西鯀歸網羅
公視羣醜皆么虧就我要約毋敢訶卓哉良士眞番番
事煩食少鬢髮皤天不少留公則那大星一落滄海波
龍宮夜叩蛟與鼉森森墓木交枝柯銘此貞石文不磨

臺灣鎮左營遊擊金君墓碑銘

君諱相字有聲一字玉泉姓金氏系出仁山先生後自
婺遷鄞祖兆麟父元泰母鄭氏洪氏並以君貴受封如
例君少負英略射命中通孫吳家言提督鍾世臣器之

劄授把總分守崑亭寨當山海交錯之處君嚴禁火伍
盜賊屏迹識者知其有將才雍正初提督楊勤恪公至
浙密諭君稽察鄰汛委任隆於諸弁四年

世宗憲皇帝詔行省文武大吏各保千總一員挑選侍
衛勤恪卽給君千總劄資送入京赴

乾清宮引

見賜藍翎侍衛行走明年授潮州左營守備

世宗召入圓明園從容咨問君奏對詳明

特旨賜宴

賜上諭二道

御製朋黨論一道及貂皮香珠紫金錠等物君以微員
末秩荷

聖天子特達之知恩賚駢蕃超越常格感而彌奮思所
以報

主知者單騎度嶺集所部而振刷之旗幟改色壁壘一
新屹然爲海外諸軍冠鄂文端公之闢苗疆也拓地數
千里而黔吏徵糧不善黔苗復大變

朝命哈元生爲揚威將軍董芳副之調滇黔楚粵六省
兵分道進剿君以肇慶都司隨征十三年六月抵古州
九月統兵六百同遊擊王璋王臣張守鳳攻喬叩等巢

獲賊首老溢十月奪三關獲賊首惡老把及其妻子十
一月率師救上江苗盛勢張礮轟山谷君親提枹鼓四
面霆擊圍遂解柳排山苗千餘人望風而遁君佯退師
而間道疾進趨其巢薄暮大雨士登山三鼓雨止縱火
攻之苗無備從睡夢中驚起駢首受戮誓不敢動乾隆
元年經略張廣泗分兵八路君從遊擊李子昌攻一帶
山正月抵擺調寨破加配山擒苗王阿扛二月擒其子
阿商奉檄還守台拱以護餉委之君自用兵以來經歷
二載冒深瘴鑿凶門百死一生萬險無阻前後掃蕩七
十餘寨陣斬八百級生縛千人獲銃礮二千刀矛弓弩

鏢甲之屬七千有奇同事諸將皆愧弗及十月苗平敘

軍功一等賞白金四十兩大綬五匹四年署廣撫中軍參將五年護肇慶副將七年擢閩省建甯遊擊分防松政二縣旋改臺灣十一年五月二十六日卒於官年五十有六君善撫士卒喪之歸也戲下有私渡海送者娶

董氏封淑人子三丹辰國子監生丹鳳府學生丹墀先君卒孫步瀛步青步雲葬鄞東老界鄉之原君之後頗式微縣乘遂無專傳裔孫某以表章先人爲念介袁笠漁來求銘余乃本其家狀參以當時奏疏爲文一通俾

勒墓道銘曰

東海下吏升聞於

帝鬼方之伐以濟百世千秋尙感恩而流涕

候選員外郎贈通議大夫王君墓碑銘

通議王君之歿也殷侍郎兆鏞已志其墓越數年嗣子祖斌需次江西具書幣以隧道之石重請爲銘君諱清瑞字芨庭一字幼樵嘉興府秀水縣人也曾祖兆盛贈通奉大夫祖元松父朝佐並贈資政大夫祖母張氏母程氏孫氏並贈夫人王氏席高貲世行其德有慶肆在蘇州貿遷往來遂卜吳江之盛澤居焉君少端慧從顧徵君廣譽問學徵君承陸清獻之統闡發儒言君遊其

門獨能措諸躬行亟亟焉以利濟爲事咸豐中江浙大亂流離蕩析之民咸集於蘇君慨然出己財設局盛澤以留養之擇寬閒之地構屋及棚男女別居日給以糜繼以飯病者予之藥死者予之棺歸者予之舟夏則席冬則被若楮衣若草茵毋有所缺量其材力時授之貲俾以負販謀升斗全活者數千人同治初元流民踵至故廠不足容乃議於同仁堂隙地增設新廠君親執畚鍤督工役晨夕不懈無何而君病猶強起倚牀幕召集同志區畫井井流民聞君疾之革也齋素禱天有願以身代者及卒焚楮帛奠酸哭之如所親嗚呼可以無憾

已君寢饋家教又受業於顧徵君深知儒先之道本於修身推暨於愛物小用則小效大用則大效毋妄以迂闊相詬病也而惜乎未竟其志也年僅三十五以同治二年正月二十一日卒葬吳縣上字圩陸墓山之麓是爲光緒二年十月二十八日淑人孫氏桐鄉人候選訓導壽齡女子二祖斌補用知府貞祿前卒女二長適嘉定舉人秦綏章次適吳縣候選州同知程增祥孫二孫女二君援例爲員外郎以祖斌三品階贈通議大夫於法宜碑繫以銘曰

銳於濟人不恤其身赴義若渴中道而泯碧石表行樹

厥墓門旣安且吉永此令聞

贈朝議大夫錢君墓碑銘

光緒己丑年家子鄭之灋手其外舅錢君行略來言曰吾外舅之歿也外姑楊恭人年僅二十有九實能承夫子之志撫孤成立中振其門戶妥居宅治祖墓擴祀田輸貲於

朝以佐防海振饑之費深明大義女而有士行者也今又爲外舅營葬而乞吾丈一言文墓石以垂示不朽吾丈其許之余按其略曰錢君諱志慎字真卿一字卯橋甯波府慈谿縣人也曾祖蛟祖熊飛並國子監生父詠

春增貢生贈朝議大夫曾祖妣沈氏祖妣馮氏母楊氏
贈恭人君少讀書通諸經章句以家貧棄而學賈昆季
眾多生產日匱乃挈一弟遊滬上躬就市列而居積之
歲有增羨比父歿本籍無餘財而君積金已萬六千有
奇遂舉分諸弟纖悉不自私也旣葬父復客於外廉三
貪五益精其術族戚子弟無生計者量其材而振業之
俾各自立周卹三黨解橐不吝修學宮建家廟咸出貲
爲倡滬上諸善舉若施衣若振粥靡弗與也年五十有
六以同治十二年九月十七日卒君一生節儉臨歿命
以布服殮誠家人曰厚葬誨盜非徒無益也嗚呼自番

舶通中華滬上爲繁盛地豪商大賈服御珍禱幾埒王
侯而君手起家殖貨萬計獨能矯乎流俗以樸素終其
身垂死諄諄猶舉節儉二字爲傳家之末命其亦可以
風矣初娶沈氏同縣人監生錢青女同治元年十月二
十日卒年四十有三贈恭人繼娶楊氏同縣人候選州
同知元驥女封太恭人子輔仁同知銜晉一級女四人
長適同知銜費相球次適監生馮宜民三適諸生鄭之
灋四適盛鐘祥孫女一人葬之地本貫東鄉花嶼湖之
大灣沈恭人祔左右則楊恭人生壙也銘曰

大功同財古則有之其既於今天性日漓操戈同室骨

肉相夷嘵嘵訟庭爭析豪釐嗚呼錢君覲閔而歸謂此
橐中父在無私孔懷兄弟一本連枝公其所蓄長幼怡
怡惟孝則友刑于寡妻繼君之志見義勇爲於古不愧
於今實希凡百君子視此刻辭

正誼堂文集卷十四

正誼堂文集卷十五

鄭 董 沛 孟如

墓碣

奉政大夫兵部職方司郎中繆君墓碣銘

宋陳了齋作豐尙書行狀但敘歷官始末而不詳其事蹟蓋文章家之變體也余攷行狀之作既以獻於太常登於史館以爲請謚立傳之底而後世亦有以之刻石者故輿地紀勝碑目有唐旌表萬敬儒孝行狀碑近世杭大宗銘梁文莊墓其序用了齋之體亦謂狀之通於碑也故余序繆君之碣從其例焉君諱炳泰後改心

泰字象賓一字霽堂常州府江陰縣人也曾祖煙贈睢
州知州祖民墳沂水知縣父廷鋗初贈承德郎再贈奉
直大夫妣岳氏周氏竝贈宜人君少隨其父遊幕於滇
粵能書善畫喜爲人寫真妍媸少長無不宛肖乾隆壬
寅客杭州大學士阿文成公以事至浙見君而賞之偕
以北聞於

上癸卯援例入太學二月恭繪

高宗純皇帝聖容賜坐氈塾以短視許戴眼鏡
溫旨垂問家世并賜飯及大綬一端明年

純皇帝幸江浙君獻詩頌

六巡之盛

召試一等

欽賜舉人授內閣中書

上迴鑾君以殯先人故不及扈行

上次山左屢以詢之近臣蓋君之承恩眷若此既到官勤慎供職自癸卯至乙卯恭繪

聖容凡五次竝更定紫光閣後五十功臣像戊申春臺灣平復繪功臣像藏紫光自嘉勇公福康安超勇公海蘭察以下皆君筆也辛亥充

萬壽盛典纂修官七月扈從灤河目病甚

特命回京賜太醫一月甲寅派內閣協辦侍讀乙卯國慶恭與

太和殿元旦筵宴嘉慶丙辰擢內閣典籍廳戊午二月承

旨詣毓慶宮恭繪

仁宗睿皇帝聖容賜端硯一方湖筆二匣袍袴料二端十一月擢兵部武庫司主事十二月充則例館纂修官庚申充順天武鄉試提調官壬戌充武會試提調官癸亥兼職方司事二月恭繪

聖容賜袍袴料各一十月擢職方司員外郎充飯銀處

監督五軍道里表纂修官丙寅三月擢武庫司郎中調職方司丁卯四月遘疾七月疾甚十二月晦卒於京邸年六十有四配徐氏封宜人側室杜氏封孺人子二霖乾隆乙卯副貢生仕某官榮國子監生仕某官皆杜出也孫男若干人孫女若干人君之始疾也霖已授知縣將赴甘肅以侍父不果往君既歿奉其喪歸某年月日葬某鄉某原道光己酉君門人長洲李芬以畫遊四明與余善每念師恩欲歸治其墓手君之狀屬余銘之余聞諸前代唐之翰林待詔以藝術供奉內廷畫其一也宋則特設畫院俾處能繪事者

國朝無專官而如意館猶其遺意張公宗蒼遂以此起家其他文學侍從之臣以善畫荷

帝眷若錢公維城鄒公一淮等則皆非館中人也君一布衣耳受

兩朝之知遇京秩廿年

天子所以褒賞之者視諸公卿無弗及焉可謂榮矣銘

曰

江陰之繆遷自開封南宋卜宅始宏毅公君少出遊宿於旅邸突如焚如神告之起茫茫潮州溪水暴流有鬼前導脫君之舟一水一火不能殺我我有姓名聞於

陛下襄襄

聖表如日如天維貌之合亦神之傳桓桓將臣有襄有
鄂毛髮森嚴酣戰於闕

帝曰俞哉汝以畫名

頒上方物爲汝寵榮廿載都中王公幣聘末疾遽膺考
終厥命墓木拱矣君安其藏宜爾子孫熾盛熾昌

殉難江西候補府經歷贈鑾儀衛經歷世襲雲騎

尉湯君墓碣銘

光緒甲申余養疴豫章湯經歷嘉麟叩門請見以其先
君死事之狀丐爲墓銘逡巡二年未及作洎自上饒返

故鄉始克爲之君諱道增字淦亭江南荆溪縣人也以
末秩分發江西署武甯典史遭喪去任道梗不得歸留
佐局務嘗解餉銀二萬及軍器火藥自武甯赴省垣中
道遇寇他部皆駭散君獨率所領埋軍器沈火藥由閒
道護餉入城大吏嘉之奏擢府經歷加六品銜賞戴藍
翎君短少精悍身不滿五尺而氣辟千人目光耿耿燭
物如炬旣感知遇思得一當以報

國履危蹈險凡大府所命咸力任之咸豐甲寅賊自鄂
竄江武甯當孔道大府檄君率兵守紐絲嶺以固縣防
君相度地勢塹茅岡築夜合山扼險以守賊夜半來犯

力戰卻之姦民陳某素通賊密約賊自通山之黃沙潭興國之龍港分兩路入境居民惶擾亟請君移營以保村落君拔隊東行遇賊於馬家山敗其前鋒賊稍挫俄而後隊虜至土盜紛紛從山上應賊亂投瓦石君與隊長譚錦福等陷賊圍大呼殺賊腰中賊矛猶左右衝突手刃數人而死錦福等皆死賊憤其力鬪殘君之屍棄之箬田阪時二月晦日也其明月賊退紳士葉占榮葉春華葉映川等覓君遺骸身首俱合乃棺而埋之又明月江撫陸元烺奏其事

詔贈鑾儀衛經歷祀昭忠祠世襲雲騎尉以次襲恩騎

尉罔替從優如千總例予祭葬銀一百八兩明年君兄
常州把總辛增扶柩回籍又明年五月二十日葬於宜
興縣東山之麓君殉難時年僅三十有七嘉麟甫袒裸
故其葬也墓無碑至是又三十年矣曾祖根承諸生祖
廷訓國子監生父德華贈修職郎曾祖妣祖妣俱周氏
母曹氏贈孺人君娶於桂江陰人常州把總德明女子
嘉麟亦以府經歷需次江西女一適武進運同銜廣東
候補知州費紹禕余攝邑清江始交嘉麟其人恂恂有
志節每述君遺事恒至泣下嗚呼其可哀已銘曰

高牙大纛望塵而奔其尤甚者揖盜開門嗟爾微官乃

殉厥身秩無崇卑知有

國恩荒郊裏骨故里招魂剖胸絕胆居然完人

朝家錫命褒以絲綸千秋不泐視此刻文

工部營繕司主事謝先生墓碣銘

乾嘉以來吾郡習經生藝者墨守

國初諸老成法深湛刻苦探天根月窟而出之造作辭句復以搏象之力用之於搏兔師弟授受沿爲衣鉢百餘年中鄉舉之士恒不足與浙西諸郡抗杭人哂之所謂過江文字劖拔弩張者也鞠堂謝先生出獨能以新法開捷徑神明於規矩而錯綜之如庖丁奏刀如伶人

鼓絃如畫家施彩色河陽壁壘耳目煥然遊其門者率能取科第稱大師鎮海若曹編修昌燮慈谿若周編修晉麒吾鄆若陳縣令康祺陸編修廷黻皆先生高弟以本師之學教授鄉里後進多從之故自

穆廟中興郡人登賢書者遂足當全錄三分之一而非浙西諸郡所能韻頗也然則先生之有功於吾郡亦偉焉矣謝氏世籍鎮海郡之望族也先生諱輔培字凱賓自署曰鞠堂祖佑潭始寓於鄞父省賢諸生並以叔第輔墀官贈庶吉士又以先生官贈朝議大夫母王氏初贈安人再贈恭人先生舉道光癸卯鄉試咸豐己未成

進士觀政工部營繕司行走積階得四品性坦易與人
交無貴賤少長胥接以和處骨肉閒恩意周篤兩弟所
取求不計多寡故屢致千金而家無一匱之植京曹多
暇亦惟耽習故業以啟來學公卿子弟及四方名宿著
錄門下者凡數百輩都人士翕然無不知有鎮海謝先
生者同治戊辰五月十二日歿於官年六十有一前娶
慈谿徐氏繼娶鄞縣李氏贈封恭人側室張氏子鑄德
徐恭人出附貢生忠州吏目鑄德張氏出女適鄞縣張
某孫四人孫女二人葬鄞西烏金碶之原余交先生踰
二十年而過從恆少壬戌寇警同寓江北岸朝夕聚首

不三月而別戊辰計偕復與先生重見京邸及歸而訃至爲泣然者久之光緒己丑鑄德自蜀中介其從兄適聲來乞墓文何可辭也乃爲之銘曰

經義取士一王之制時哉時哉卅年爲世隆萬啟禎恢於化治其理則同其格則異譬古文辭漢華唐樸風會所趨類難免俗淵乎先生乘時而作純者利之于金良藥青青子衿交錯於戶薪火淵源奉爲宗主功在一鄉魄歸於土斯爾孫曾克繩祖武

兩浙候補鹽大使毛君墓碣銘

君姓毛氏諱祥麟字瑞文一字對山其先籍吳縣曾祖

定西始自洞庭東山遷居上海遂爲上海縣人祖肇烈
廩生父鴻榮庠生祖妣張氏邢氏妣浦氏君世儒業幼
歲能文十三患瘵疾禁不使讀閱四年病愈遂不復試
工詩善畫旁通醫術皆有神悟援例入國子監以鹽大
使需次杭州非其志也不數月聞母夫人病踉蹌而歸
既遭喪絕意仕進家本少康邁鄉土之亂一徙於吳江
再徙於華涇三徙於南匯之周浦東西竄匿漸至空乏
一家十餘口賴醫以給然承先人志好義不怠房從昆
季貧不能衣食者衣食之死不能棺殮者棺殮之子女
不能婚嫁者婚嫁之待諸外姍亦有恩紀粵寇平常潤

一帶棄孩滿道路君謀諸同人釀貲收養先後三百餘口此其尤著也上海稱要地值道咸之間兵禍相踵歲壬寅英吉利陷之越癸丑劉麗川據之未幾粵寇紛擾數載始定君採其遺事爲三略彙編十二卷功罪明確足以補史牘所未備又輯桑梓佚事爲墨餘錄十六卷其書盛行賈者以爲利格言四卷則傳家之訓也史乘採珠二十四卷則稽古之學也事親一得十二卷增註達生二卷則論醫之書也別著醫話詩話畫話曰對山三話余嘗取其醫話序之卒於光緒九年十月十三日年七十有二配蔣氏同縣人卒於光緒七年九月十三

日年六十有七子四錫垣增廣生前卒錫鏞庠生錫棟
錫錦俱前卒女二長適同縣進士樂平知縣李曾珂次
適同縣廩生徐頌增孫五人孫女四人曾孫女四人余
屢客上海卽知上海有毛君者方聞士也及觀所著墨
餘錄盱衡世變皆有深識非第尋常小說家言益心契
之光緒四年需次江西與其長婿李君同修省志始知
君亦寓南昌顧以年老多病閉關謝客終未能一望顏
色以慰數年思慕之意殊自悵悒君論醫與余頗合余
於醫話序中亦略及之嘗願以他日東歸謁君黃浦一
證所學之異同而君已歸道山息壤之言徒成虛約矣

光緒十年十一月十六日葬君於本縣二十六保十四
圖絲字圩李君以事略來請表墓遂不辭而銘之銘曰
匪仕亦仕匪隱亦隱餘事多能德者其本惟孝則友基
之自近好善樂施旁汲韶齡高年古稀邁疾而殯冢木
千秋令聞不泯

封奉直大夫中書科中書張君墓碣銘

君諱錫偉字歲昭一字梅仙其先居江南之定遠元至
正中有諱野先者以清泉鹽司卽家於官張氏始籍定
海

皇朝康熙中置定海縣於元之昌國州而改舊定海曰

鎮海遂爲鎮海縣人曾祖懋甲諸生祖志翼父沃均國子監生贈如君官祖妣李氏贈孺人妣吳氏贈孺人並晉贈宜人君少讀書不屑屑章句博覽經史斬爲有用之學以見用於世既成諸生會天下多故鬱鬱無所遇乃本許魯齋之說小試於治生然非其志也先世有廬肆在滻瀆歲需賴之及君之孤也方稚年諸友侵蝕累千百計資以折閱君旣長斥其田二百畝而重振之不數年益恢其舊增設數肆收三五之利億則屢中同輩莫能逮也以是業隆起郡之人稱巨家無不知有衙前張氏者咸豐初年寇禍起

朝廷方急軍需下納粟之令以風天下君率先輸官亡
慮數千金江浙告警海隅羣不逞之徒亦乘閒剽奪君
倡義集貲借諸父老行團練以兵法部勒子弟軍容儼
然鄉里皆安堵甲寅邑大饑盡發藏粟以振貸之力不
足則告糴以繼之全活者無算光緒乙酉法蘭西窺鎮
海君與諸紳士助饑急公士宿飽能卻敵浙東遂無事
他若築塘浚河砌路造杠修祠建塔施棺掩骼諸善舉
亦靡弗與也生平負幹材雖經濟之略略施於鄉里而
未獲見用於世終以爲憾旣不遇乃出其所學以教於
家子若孫承君之誨已先後取科第張氏之盛蓋方熾

而未艾已君以諸生充貢援例授中書加五品銜長子
貴封奉直大夫光緒己丑正月十七日卒年六十有一
宜人劉氏理問銜朝斌女向氏贈登仕郎泰福女並同
縣人邵氏監生淮女定海人沈氏監生兆金女鄞縣人
側室應氏子六昌年同治丁卯舉人內閣中書汝樅監
生俱劉宜人出汝楨監生向宜人出汝桐汝桂邵宜人
出汝榕沈宜人出女四向宜人出者一適理問銜向樹
棠邵宜人出者三適候選同知樂嗣音國子監典籍王
崇義季未行孫一士模光緒戊子副貢生昌年等擇十
月二十五日葬君於本貫崇邱鄉謝墅橋之原以余有

同譜之好伴來乞銘乃序其略而銘之其辭曰
君之志在經世鄉國中亦小試而不獲大展其用遽溘
焉而長逝道積於躬祚爾來裔鳴呼此不磨者貞石之
文字

內閣中書舍人吳君墓碣銘

同里朋好中以孤兒事寡母若陳徵君勵烏明經世耀
劉孝廉鳳章咸有擎行而莫著於吳君經湘自一門宗
鄉以至鄰邑交遊凡稱君者皆曰楚三真孝子楚三者
君之字也君世籍鄞縣以高貴稱族父傳錯族兄經濬
並登科第越三十年而君繼之博習經史兼工詞章一

時名輩倡文社以判甲乙胥推重君性嗜酒遇時節招
諸同好爲琴樽之會微醺卽止從不及亂聞母氏聲歎
瞿然以驚趨入起居命之出乃出座有醉人亦屏息而
待毋敢有呶於室者弱冠失怙承先志別構新宅奉母
氏居焉母春秋高恒有痼疾君扶持抑搔謹伺其食息
不失時刻躬治湯藥依依牀第閒雖嬉嬉環列不它諉
也旣遭喪哀毀骨立弔者登堂聞苦次哭泣作孺子聲
相顧太息不終食而去以是遠近稱孝子無異辭云蘇
子瞻曰上以孝舉則勇者割股怯者廬墓此好名之士
所爲非孝也聖門論孝首在色難有深愛斯有渝色有

愉色斯有婉容不必以奇節特行焜耀於耳目而眞誠所感神鬼通之中庸所以不可及也如吳君者亦庶幾焉矣君舉咸豐己未鄉試以輸餽功授內閣中書舍人晉階爲奉直大夫辛酉正月十三日旋卒年四十有三曾祖文炳妣嚴氏張氏祖章妣嚴氏考傅鋗妣嚴氏自祖以下並以君官贈封如制宜人汪氏同縣監生正之女事姑盡孝與君同志其卒也後君十七年是爲光緒戊寅九月朔日年六十有二子三世榜九品銜世薪候選布政使司經歷世梧監生女五長早殤次適同縣同知銜陳衍三適鎮海舉人王殳讓四適同縣監生陳

鴻彥五適同縣庠生童鳳岐孫七人孫女六人曾孫二人光緒乙酉十一月十六日葬縣西鄉楊家水坂之原明年始來乞銘銘曰

激烈之行朝以孝旌肫篤之愛鄉以孝稱生事死葬一準禮經平平無奇造乎至精嗚呼吳君無忝所生斯惟庸德夫婦與能啟手啟足朝夕兢兢歸於其居休哉令

名

贈奉直大夫中書科中書童君墓碣銘

光緒乙亥余與童君笠村相晤於陳氏張燈置酒座客六七人刺取經傳僻字以爲諧樂余於是知君越三年

君歿余赴官江右不克臨弔比歸君諸子卜日將葬以表墓之文爲請乃不辭而爲之君諱師曾字瞻菴笠村其自署也先世故鄞產宋時遷慈谿之馮門遂爲慈谿縣人曾祖宏度妣莊氏祖慈昭妣何氏父文霖妣華氏自祖以下並以君第駿聲銜贈朝議大夫祖妣妣皆恭人君少讀書材質明敏未弱冠開塾爲鄉里師昆明趙文恪公視學吾浙拔冠童子軍嘉予備至決其遠到而君七試於鄉不獲一遇亦泊然不爲意也能詩善詞同郡章祭酒鑾裘孝廉性宗倡聚香吟社君與其列稱社中眉目所著龍江詩鈔吟花館詞皆繕寫成帙藏之篋

中事母盡孝母病目君偕其弟朝夕祈禱目以復明爲父卜墓兆已有定所掘地數尺覩一碑則前人冢也急封之而葬父其側子孫省墓別設酒饌祭之歲以爲例辛壬之交粵寇陷郡縣羅致聲望之士強畀僞職鄉人通於賊以君負才謂百計購之君脫身走卒不爲賊屈也光緒丁丑十二月四日卒年五十有七以諸生援例授中書科中書嗣以叔子季眉階五品贈奉直大夫前娶陳氏鎮海人監生政揚女咸豐辛酉五月二十日卒年四十有三續娶沈氏山陰人監生大榮女後君十年卒是爲丙戌二月三日年五十有一子四陳宜人出者

三遜廉遜隅皆監生季眉五品銜廣東候補縣丞沈宜人出者一遜涵女三長適同縣庠生王仁光次未行三適同縣盛炳慶孫三人葬之期丁亥四月七日也余解官歸里里中諸朋好大半零落舊遊如君雖不常晤時復追悼於君之葬也安忍無銘銘曰

淇水滔天汙我浙水推波助瀾濟濟多士嗚呼童君屹乎中流撓之不濁一節千秋豈況家庭嫗篪協律翳重開愈其母疾匪孝無親匪義無君君親兩盡盡此一身箕厥幽居宅西上阪勒石有辭我愧不喚

贈徵仕郎董府君墓碣銘

同治七年十一月二十九日余族兄崧葬其先贈公於
鄞東鄉盛弓漕之原而穴其右以爲生圹屬余銘之以
表諸碣吾董氏在宋南渡自河南遷明州世爲鄞縣人
贈公諱峻字子天曾祖義國子監生祖雲廷諸生父璿
母樂氏贈公少失怙樂太安人撫之成立娶應氏生子
崧甫三歲而贈公歿應安人上事邁姑下鞠孤子以克
保家業一門雙節旌於

朝如例先君子之少也孤貧不克延師將廢學贈公則
出己資佐之及余七歲與崧同學崧亦以愛弟視余兩
家再世中於分則總功昆季也而相處不啻同氣余故

尤德之贈公以道光二年八月十一日卒年二十六安人以道光二十九年九月十二日卒年五十二子淞國子監生以輸餉功議敘按察司經歷銜贈二代如其官娶張氏孫五道烈廩生道照國子監生道熙道煦道勳孫女四葬有期淞流涕謂余曰吾三歲而孤旣長習青囊家言亦嘗徧求邑之名山川以妥先人之骨而未獲也今姑卜地定窓而吾他日依於左右歿而有知得稍盡子職庶可以無憾乎子盍銘之銘曰

節有後孝有終父斯宅于其從闢潛德光熊熊
先嚴初議坿葬先大父墓旁此文已上石嗣因壞地

追狹不肖輩別葬先嚴於大涵山請先生更撰誌銘
而不果得不肖輩有餘憾矣今校刻先生文集仍存
原作欲藉以彰先德且以釋吾後人讀此文者之惑
也故識其略如右

族姪縉祺識

正誼堂文集卷十五